


**Ni Presidente
Dieter F. Uchtdorf**
Maikadua a Mammagbaga iti
Umuna a Panguluon



Sapasap a Komperensia— Saan a Gagangay a Bendision

Maysa a nasingpet a miembro ti Simbaan ti makisarsarita iti maysa a kaarruba a saantayo a kapammatian. Idi naiturong iti sapasap a komperensia ti saritaan, sinaludsod ti kaarruba, “Kunam nga addaankayo kadagiti propeta ken apostol? Ken mamindua iti makatawen iti komperensia ti intero a lubong nga agipaltiingda iti balikas ti Dios?”

“Husto ta kunam,” insungbat ti miembro nga addaan panagtalek.

Nagpanunot ti kaarruba iti apagapaman. Kasla sipupudno nga interesado ket kalpasanna dinamagna, “Ania ti imbagada itay kaudian a sapasap a komperensia?”

Iti daytoy a gundaway ti nasingpet a miembro ti Simbaan ket nasukatan iti pannakapabain ti panaggagarna a mangibinglay iti ebanghelio. Pinadasna ti kabaelanna ngem saan a makapagpanunot kadagiti detalye maipapan iti maysa a bitla.

Natakuatan ti gayyemna daytoy a pannakariribukna ket kinunana, “Kayatmo a sawen kaniak a makisasao ti Dios iti tao iti aldawtayo ket saanmo a malagip no ania ti imbagana?”

Nakarikna iti panagpakumbaba daytoy a kabsat a lalaki iti daytoy a panagsinnungbat. Inkarina nga ikarkarigatannanton a lagipen dagiti balikas nga insao dagiti katulongan ti Apo iti sapasap a komperensia.

Ammotayo amin no kasano ti karigat ti manglagip

iti tunggal mensahe ti sapasap a komperensia, ken agtalekak a saantayo koma a mapabainan no ditayo malagip ti amin a banag. Nupay kasta, adda dagiti mensahe iti tunggal sapasap a komperensia a naited a kas maysa a sagut ken maysa a bendision a naggapu iti langit a naipangpangruna nga agpaay kadagiti bukod a kasasaad ti panagbiag.

Kas panagsagana para iti sapasap a komperensia, bay-andak a mangisingasing iti tallo a kangrunaan a konsepto a mabalin a makatulong kadaytoy a nasaysayaat nga umawat, manglagip, ken mangyaplikar kadagiti balikas nga insao dagiti katulongan ti Apo.

1. Maikari dagiti miembro ti Simbaan iti bukod a paltiing bayat ti panangdengngeg ken panangadalda kadagiti naparegta a balikas a naisao iti sapasap a komperensia.

Bayat ti panagsaganayo para iti sapasap a komperensia, awisenkayo a mangutob kadagiti saludsod a kasapulanyo a nasungbatan koma. Kas pagarigan, mabalin nga agkalikagumkayo iti pangiturong ken pannarabay ti Apo maipanggep kadagiti karit a sangsanguenyo.

Dagiti sungbat kadagiti masinunuo a kararagyo ket mabalin nga umayda a direkta manipud iti naipangpangruna a bitla wenno manipud iti masinunuo a ragup dagiti balikas. No dadduma mabalin nga umay

dagiti sungbat iti kasla saan a mainaig a balikas, ragup dagiti balikas, wenno kanta. Ti maysa a puso a napnuan iti panagyaman kadagiti bendision ti biag ken napasnek a tarigagay a dumngeg ken sumurot kadagiti balikas ti balakad ket mangisagananto iti wagas para iti bukod a paltiing.

2. Saanyo a tagibassiten ti maysa a mensahe gapu ta mangngegan daytoy a familiar.

Kanayon a nasuruan dagiti propeta babaen iti pannakadagdagullit; daytoy ti linteg ti panagsursuro. Mangngeganyonto ti pannakadagdagullit dagiti tema ken doktrina iti sapa sap a komperensia. Bay-andak a mangipanamna manen kadakayo: saan a gapu iti kaawan iti kinamanagpartuat wenno kinamanagpanunot. Itultuloytayo a denggen dagiti mensahe maipapan kadagiti isu met la nga isyu gapu ta isursuro ken imalmaldit ti Apo iti pampanunot ken puspustayo dagiti masinunuo a pagbatayan a mainaig iti pundasion nga addaan iti naindaklan nga agnanayon a kinapateg a nasken a maawatan ken maaramid sakbay nga ituloytayo nga aramiden dagiti dadduma pay a banag. Umuna nga ikabil ti masirib nga agbangbangon ti pundasion sakbay ti panangipanna kadagiti diding ken atep.

3. Dagiti balikas a naisao iti sapa sap a komperensia ket agbalin koma a maysa a Kompas a mangitudo iti dalan kadatayo kabayatan dagiti umay a bulan.

No denggen ken surotentayo dagiti parikna ti Espiritu, agserbidanto a kas maysa a Liahona, a mangtartarabay kadatayo iti unos dagiti saan nga ammo, a mapannubok a tantanap ken bambantay a masanguanan (kitaen iti 1 Nephi 16).

Manipud pay rugit ti lubong, nangpatanoren ti Dios kadagiti propeta a mangisao iti pagayatan ti langit kadagiti tao kadagiti panawenda. Pagrebbengantayo ti dumngneg ket kalpasanna yaplikartayo dagiti mensahe nga it-ited ti Apo nga agpaay kadatayo.

Ti manangngaasi ken managayat a Nailangitan nga Amatayo ket saanna a binaybay-an ken saannanto a baybay-an dagiti annakna. Ita nga agdama, kasta met kadagiti napalabas a panawen, Isu ket nangdutok kadagiti apostol ken propeta. Itultuloyna ti mangipalgak iti balikasna kadakuada.

Anian a nakaskasdaaw a pribilehio ti dumngeg

kadagiti mensahe ti Dios nga agpaay iti tunggal maysa kadatayo kabayatan ti sapa sap a komperensia! Agsaganatayo koma a nasayaat para iti daytoy naindaklan a bendision ti nadosan a pannarabay nga inyawat dagiti napili a katulonganna.

Gapu ta daytoy ket saan a gagangay a bendision.

PANANGISURO MANIPUD ITI DAYTOY A MENSAHE

- Aggigiddankayo a mangbasa iti artikulo. Allukoyenyo ti pamilia a mangibagada kadagiti banag a denggen kabayatan ti sapa sap a komperensia.
- Tapno matulongan dagiti babassit nga ubbing a mangyaplikar iti balakad nga inted ni Presidente Uchtdorf, ipakitayo kadakuada ti tsart ti General Authority (a masarakan iti isyu ti komperensia ti *Liahona*). Ipakaammoyo kadakuada a ti Umuna a Panguluen ken Korum dagiti Sangapulo-ket-dua nga Apostol ket agsaritadanto iti sapa sap a komperensia. Allukoyenyo dagiti annak a dumngeg iti komperensia ken mangidrowing iti ladawan a makatulong kadakuada a manglaglagip iti no ania ti nasursuroda. Mabalina bisitaen dagiti nagannak ti conferencegames.lds.org para iti ad-adu pay nga aktibidad ti komperensia para kadagiti annak.

AGTUTUBO

Nasayaat, Nasaysayaat, Kasayaatan Ni Mary-Celeste Lewis

Iti bitlana iti sapa sap a komperensia ti Oktubre 2007, ni Elder Dallin H. Oaks ti Korum dagiti Sangapulo-ket-dua nga Apostol ket nagsarita maipapan kadagiti aktibidad a “nasayaat, nasaysayaat, ken kasayaatan.” Idi nagsarita isuna maipapan iti “nalabes a panagiskediul iti oras dagiti annak para kadagiti nurnos nga aktibidad,” sibabain a nagpusiposak iti nagtugawak.

Ammok a nalabes unay ti ar-aramidek. Nakiramanak kadagiti drama ti eskuela, agat-atendarak kadagiti mapannubok a klase iti pagadalan, ken nakiramanak iti sumagmamano a sabali pay nga aktibidad. Diak idi sipupudno a dumardar-ay kadagiti aktibidad ti Young Women, ket napnuan iti pannakaburibor dagiti

aldawko iti Domingo gapu iti panangikarigatak a mangileppas iti trabahok iti pagtaengan iti kaudian a minuto. Naawan ti essemko iti panagpraktis iti musika ken panagedit iti pagiwarnak ti pagadalan gapu iti pannakumikomko iti trabahok.

Ti bitla ni Elder Oaks ti nangipalagip kaniak a kitaek a naimbag ti iskediuiko. Nasayaat dagiti aktibidadko, ngem nalaus ti kaadu dagitoy. Nasken a piliek dagiti kasayaatan. Bayat ti panangikeddengko no ania kadagiti aktibidad ti ikkaten, naamirisko a ti ebanghelio ni Jesucristo ti kangrunaan a prioridad nga adda iti asino man. Inkabilko nga umuna iti listaak ti panagkararag ken panagadal iti nasantuan a kasuratan ken manipud idin, ad-adda a simmayaat ti panagbiagko.

Sinuruannak ni Elder Oaks a no aramidentayo ti kayat ti Apo nga aramidentayo nga *umuna*, amin a banag ket maisublinto a nasayaat iti lugarda. No adalek dagiti nasantuan a kasuratak sakbay nga agay-ayamak wenno uray sakbay nga aramidek ti trabahok iti pagtaengan, maileppasto ti amin a napapateg a banag. No ibasarko ti biagko iti aglawlaw ti Apo, imbes a pananginayonko Kenkuana a kas napanunot, ti biagko ket adda maysa a nainayon a pagrukodan ti talna ken balligi.

Itan naannadak unay a dumngeg iti balakad a maitited iti sapsap a komperensia!

ANNAK

Masarakak dagiti Sungbat babaen ti Sapsap a Komperensia

Sursuro ni Presidente Uchtdorf a no panunotem ti sumagmamano a saludsod kasanguanan ti sapsap a komperensia, makasaonaka ti Apo babaen kadagiti propeta ken apostolna kabayatan ti komperensia.

1. Kas maysa a familia wenno klase, pagsasaritaanyo no ania ti nasken a sursuruenyo, kas individual wenno sangkamaysa. (Kas pagarigan: Kasano a mapapigsak ti pammanekneko? Kasano ti nasken a panangsangok iti maysa a problema iti pagadalan?) Iti maysa a panid ti papel wenno iti diurnalmo, isuratmo dagiti saludsodmo.
2. Kadagiti lawas kasakbayan ti komperensia, mabalinmo a panunoten ken ikararagan maipapan kadagitoy a saludsod.
3. Dumngegka a nasayaat kabayatan ti komperensia (makatulong no agisuratka). Kalpasanna isuratmo no kasano a sinungbatan ti Apo—babaen kadagiti lider ti Simbaan—dagiti saludsodmo.
4. Iti sabali pay a panid ti papel, mabalinmo ti mangidrowing iti maysa a ladawan ti bagim a mangaramid iti no ania ti nasursurom.



Pammati • Pamilia • Tulong

Panangpapigsa kadagiti Pamilia babaen ti Panangpadur-as iti Kinaespirituan

Adalenyo daytoy a material, ken no maitutop, paglilinnawaganyo daytoy kadagiti kakabsat a babbai a sarungkaranyo. Usarenyo dagiti saludsod a mangtulong kadakayo a mangpapigsa kadagiti kakabsatyo a babbai ken mangaramid iti Relief Society nga aktibo a paset iti bukodyo a biag.

Ni Julie Beck, sapasap a presidente ti Relief Society, kinunana: “Adda napadur-as kaniak a napalaus a pammaneknek maipapan iti ik-ikkan pateg dagiti annak a babbai ti Dios. . . . Nariknak nga awan iti kaano man dakdakkal pay a panagkasapulan para iti napapigsa a pammati ken bukod a kinalinteg. Awan iti kaano man dakdakkal pay a panagkasapulan kadagiti napigsa a pamilia ken pagtaengan.”

Makatulung dagiti kabsat a babbai a mangparnuay kadagiti napigsa a pagtaengan ken pamilia bayat ti panagtignayda maipapan iti bukod a paltiing. “Ti kabaelan a maikari, umawat, ken agtignay iti bukod a paltiing ket maysa a kapatgan a paglaingan a mabalin a magun-od iti daytoy a biag,” intuloy ni Sister Beck. “Ti pannakaikari iti Espiritu ti Apo ket mangrugi iti maysa a tarigagay para iti dayta nga Espiritu ken agkasapulan iti umisu a tukad ti pannakaikari. Ti panagtungpal kadagiti bilin, panagbabawi, ken panangpabaro kadagiti katulagan a naaramid iti panagbuniag ket mangiturong iti bendision ti kanayon a kaadda ti Espiritu ti Apo kadatayo. Ti panagaramid ken panagtungpal kadagiti katulagan iti templo ket mangnayon pay iti naespirituan a pigsa ken bileg iti biag ti maysa a babai. Adu a sungbat kadagiti

naririgat a saludsod ket masarakan iti panagbasa kadagiti nasantuan a kasuratan gapu ta dagiti nasantuan a kasuratan ket maysa a tulong iti paltiing. . . . Ti inaldaw a kararag ket kasapulan unay iti panangkadkadua ti Espiritu ti Apo kadatayo.”¹

Naespirituan a mapapigsatayo pay dagiti miembro ti pamiliatayo bayat ti panangtulongtayto kada-kuada a maawatanda ti agnanayon a plano ti Nailangitan nga Ama. “Ania ti maaramidtayto tapno nasaysayaat a maisaganatayo a naespirituan dagiti annaktayo para kadagiti agnanayon nga akemda?” dinamag ni Elder M. Russell Ballard ti Korum dagiti Sangapulo-ket-dua nga Apostol. “Nalabit a ti kangrunaan nga ibilang a sungbat ket: Suruan ida no kasano ti agbiag ken agtungpal kadagiti pagbatayan ti ebanghelio.” Maaramid daytoy a panangisuro babaen ti inaldaw a panagkararag, panagadal kadagiti nasantuan a kasuratan, ken kadagiti oras ti pannangan ti pamilia kasta met iti family home evening ken panagatendar iti Simbaan. Inlawlawag ni Elder Ballard: “Agsaganatayo iti inaldaw, ita met laeng, para iti agnanayon a biag. No saantayo nga agsagsagana para iti agnanayon a biag, agsagsaganatayo para iti maysa a banag a bassit ti pategna, nalabit a maysa a banag nga awan kaes-eskanna.”²

Manipud kadagiti Nasantuan a Kasuratan

Proverbio 22:6; 1 Juan 3:22; Doktrina ken Katulagan 11:13–14; 19:38; 68:253

Manipud iti Pakasaritaantayo

Insuro ni Propeta Joseph Smith kadagiti kabsat a babbai iti miting ti Relief Society idi Abril 1842 nga adda napasnek nga obligasionda nga agkalikagum a manggun-od iti bukodda a pannakaisalakan. Kinunana, “Kalpasan ti panangisuro[k], agbalinkayonto a responsible wenno agsungbat kadagiti bukodyo a basbasol; daytoy ket makaay-ayo a dayaw a nasken a magnakayo iti sanguanan ti Nailangitan nga Amatayo tapno maisalakanyo ti bagbagiyo; responsabletayto wenno agsungbat-tayo amin iti Dios para iti wagas a pakarayrayan ti lawag ken pakadurasan ti sirib nga inted ti Apotayo tapno mangted kabaelan kadatayo a mangisalakanyo iti bagbagitayo.”³ Sinuruanna ida nga agbalin a nalin-teg a tattao, agbalin a nasantuan a tattao, ket agsaganada para kadagiti ordinansa ken katulagan iti templo.

DAGITI NAGADAWAN

1. Julie B. Beck, “And upon the Handmaids in Those Days Will I Pour Out My Spirit,” *Liahona*, Mayo 2010, 10, 11.
2. M. Russell Ballard, “Spiritual Development,” *Ensign*, Nob. 1978, 65, 66.
3. *Teachings of Presidents of the Church: Joseph Smith* (2007), 355.

Ania ti Maaramidko?

1. Kasano a matulongak dagiti kakabsatko a babbai a mangpadur-as iti panagpannurray iti bukod a kabaelan?

2. Kasano a mapasayaatko ti bukodko a kabaelan a mangbigbig ken mangsungbat iti Espiritu Santo?

Para iti ad-adu pay nga impormasion, mapan iti www.reliefsociety.lds.org.